

Rasulullah, Pucat Mukanya Tatkala Melihat Sa'ad Dimakamkan

Ini ialah cerita yang terakhir dari sejarah Sa'ad Bin Mu'ādh, sahabat utama Rasulullah (S.A.W)

kehilangannya disebut 'Ā'ishah sebagai kehilangan yang sangat merugikan umat Islam.

Setelah mendengar jawapan Sa'ad itu, sebahagian kaumnya balik ke kampung suku 'Abd Aṣhal. Sebahagian daripada pemimpin-pemimpin Yahudi Bani Qurayzah datang meminta perlindungan sebelum Sa'ad memberi keputusan kelak kepada mereka.

Ketika Sa'ad sampai kepada Rasulullah, berkatalah Muhammad kepada orang-orang Muhajirin dan Ansar:

"Berdirlah memberi hormat kepada pemimpinmu!"

Mereka semua serentak bangun memberi hormat dan kemudian berkata:

"Rasulullah telah melantik tuan, Abā 'Umar untuk menghukum budak-budak Yahudi Bani Quraizah."

"Menjadi kewajipan tuan-tuan untuk memelihara janji Allah dan kepercayaannya. Apabila aku menghukum, adalah dengan hukum Allah"- kata Sa'ad dari atas kudanya.

"Baik!"- jawab mereka.

"Hak siapakah di sini?", bertanya Sa'ad sambil mengisyaratkan ke suatu sudut di tempat mana Rasulullah berada sedang Sa'ad ketika mengucapkan itu menundukkan kepala kerana menghormati Muhammad.

"Ya, benar!" sahut Nabi.

"Saya menetapkan hukum bunuh (mati) kepada

orang lelaki mereka", berkata Sa'ad dengan tetapnya, "mengambil harta benda mereka dan menjadikan budak belian anak-anak dan perempuan-perempuan mereka!" "Memang tuan telah menghukum dengan hukum Allah", menjawab Rasulullah.

Hukuman yang dijatuhkan ini adalah menurut ahli-ahli sejarah mengikut hukuman kaum Yahudi sendiri, atas orang-orang yang berkhanat pada waktu-waktu yang cemas.

Mengapa Rasulullah mengatakan bahawa Sa'ad telah menghukum dengan hukum Allah?

Menurut ahli sejarah ialah bahawa Sa'ad memutuskan bahawa perbuatan Bani Quraizah itu tidak lebih ringan daripada suatu musuh yang kalah - dan kerana itu hukuman ke atasnya hendaklah dilakukan mengikut hukum orang-orang Yahudi sendiri iaitu hukuman yang dijatuhkan Sa'ad sungguhpun keras tetapi diasaskan kepada kitab orang Yahudi sendiri dengan pilihan mereka sendiri yang dipandang suci oleh mereka.

Setelah mendengar persetujuan Rasulullah tentang keputusan yang telah diambilnya menghukum Yahudi itu, Sa'ad berdoa kepada Allah:

"Tuhanku Engkau mengetahui bahawa kegemaran yang besar sekali ialah berjihad pada jalan Engkau untuk

menghancurkan kaum yang telah mendustakan Rasul Engkau dan mengusirnya.

“Tuhanku aku berfikir bahawa perperangan antara kami dengan mereka telah tidak ada lagi. Kalau sekiranya perperangan antara kami dengan kaum Quraisy masih ada sedikit lagi, berilah peluang kepadaku untuk memerangi mereka; dan kalau sememangnya telah Engkau memberhentikan sama sekali perperangan di antara kami, maka biarkanlah mereka berbuat durjana dan fasik, supaya berpeluang aku mati dalam menindas kefasikan mereka.”

Setelah siap bermunajat kepada Allah maka Sa‘ad balik ke khemah Rufayyah. Lukanya bertambah parah.

Rasulullah mengikut dari belakang dan tidak lama antaranya sesudah Sa‘ad masuk ke dalam khemah itu, Rasulullah pun masuk ke khemah itu mendapatkan Sa‘ad yang telah parah itu.

Rasulullah memeluk sahabatnya yang utama itu sehingga muka beliau berlumuran darah daripada luka-luka Sa‘ad itu. Beliau peluk Sa‘ad dengan kasih mesra yang bersangatan dan lambat-lambat kemudian beliau berkata:

“Tuhanku! Sesungguhnya Sa‘ad telah berjihad pada jalan Engkau dan telah membenarkan Rasul Engkau. Kerana itu terimalah rohnya dan tempatkanlah di tempat yang sesuai bagi seorang sahabat.”

Ketika Sa‘ad mendengar doa Rasulullah segera ia membuka matanya dan berkata:

“*Al-salām ‘alaykum* Ya junjunganku! Saya menyatakan sekali lagi bahawa tuan adalah Rasulullah”

Setelah itu Sa‘ad pun dibawa oleh keluarganya

di perkampungan kabilah ‘Abd Aşhal supaya dalam masa ia sakit berada di tengah-tengah kaumnya.

Nabi Muhammad balik ke rumahnya dan hari pun tidak lama antaranya telah malam.

Dunia malam telah mengharung, manusia masing-masing tidur dan tidak lama antaranya, dalam tengah malam itu Rasulullah terkejut daripada tidurnya kerana Jibril datang menyeru:

“Siapakah di antara umatmu, Ya Muhammad, yang apabila mangkatnya di waktu malam lalu bergembira sekalian ahli langit?”

Sayup-sayup terdengar suara jawapan:

“Ingat! Bahawa Sa‘ad berpulang ke rahmat Allah...”

Setelah mendengar berita dari Jibril itu, dengan bergopoh-gapah pergilah Muhammad dan manusia yang banyak di kampung kabilah ‘Abd Aşhal sehingga kasut (terompah) Nabi terlepas dari kakinya. Melihat keadaan Rasulullah yang terburu-buru dan tergesa-gesa itu, seorang lelaki bertanya:

“Ya Rasulullah! Mengapa sedemikian ini cepatnya sehingga manusia yang banyak telah lelah?

“Saya khawatir bahawa malaikat akan mendahului saya sebagaimana yang telah terjadi pada Handalah”.

Setibanya di rumah Sa‘ad, masuklah Nabi seorang dirinya ke bilik tempat Sa‘ad terbaring sedang mayatnya terlentang di atas tilam. Dengan suaranya yang terharu Muhammad bersabda:

“Berbahagialah Ya ‘Abū ‘Umar! Berbahagialah Ya ‘Abū ‘Umar! Semoga Allah memberi engkau pahala yang besar. Engkau

telah menunaikan janji kepada Allah, semoga aku menepati pula janjinya kepada engkau.....”

Mendengar ucapan Rasulullah, Hindon ibu Sa'ad menangis:

Sebatang kara kini ibumu, Sa'ad

Remuk hatiku dibakar cinta.....

mendengar itu orang bertanya:

“Engkau bersajak meratapi Sa'ad?”

Esoknya mayat Sa'ad dibawa orang ke tempat perkuburan. Ketika jenazah diletakkan orang di liang lahad, wajah Rasulullah berubah dan mengucap tasbih tiga kali dengan diikuti oleh hadirin.

Kemudian Rasulullah bertakbir pula tiga kali diikuti oleh hadirin.

Berhubung dengan ini maka seorang hadirin bertanya:

Kami lihat wajah tuan berubah Ya Rasulullah, dan tuan mengucapkan tasbih tiga kali.”

“Kubur Sa'ad akan ditimbuni” jawab Muhammad ” Badannya akan terhimpit. Andai kata boleh lepas seorang daripadanya, tentu lepas Sa'ad.

Ketika itu datanglah ibunya dan hendak melihat wajah anaknya di liang lahad itu. Oleh hadirin dan disuruhnya supaya ibu Sa'ad balik sehingga Nabi berkata:

“Biarkan”.

Maka dikatalah Hindon ibu Sa'ad itu memandang anaknya yang sedang berbaring di liang lahad sebelum kuburnya ditimbas. Kemudian dengan perlahan-lahan ibu yang berbahagia itu berkata:

“Kulepaskan engkau wahai anakku pulang ke hadrat Allah”

Demikianlah pemimpin kaum Aus yang sangat besar jasanya dalam perkembangan Islam telah pergi-pergi ke tempat yang kekal abadi dalam usia yang masih muda iaitu baharu berumur 33 tahun.

Seluruh riwayat hidupnya menunjukkan kesucian jiwa sama ada ketika sebelum Islam apalagi sesudah Islam. Ia memberi contoh pengorbanan-pengorbanan yang suci yang sukar mencari tandingannya. Ia mengorbankan hartanya dan segala-galanya untuk Allah sehingga akhirnya ia syahid dalam menjalankan tugas untuk membela agama Allah:

Ummu al-Mu'minīn 'Ā'ishah mengenai kematian Sa'ad Bin Mu'ādh berkata:

“Kematian Sa'ad adalah satu kehilangan yang sangat besar bagi kaum Muslimin”



Suatu pemandangan umat Islam daripada berbagai-bagai bangsa sedang sembahyang di Masjid Washington